

# Teknologia Moderno i Bida Humano

Teknologia moderno ta maravioso. Teknologia moderno ta hasié pusíbel pa transplantá diferente parti for di un kurpa pa otro. Teknologia moderno ta laga un Boeing 747 pisá zuef den laira. Teknologia moderno ta laga nos komuniká sin waya ku hende leu ayá via telefon selular. Teknologia moderno ta hasié pusíbel pa ehikutá beibinan indefenso na forman mas kruel...

Ablif? Esei **no** ta algu maravioso! Sigur ku nò. Ma ta parse ku algun hende si ta konsiderá e uso di teknologia moderno pa abortá maravioso tambe.

Aborto no ta un fenómeno moderno. E emperadó chines, Shen Nung (2737 te 2696 B.C.) a preskribí bebe sierto droga pa kousa aborto. Tantu e Kódigo di Hammurabi (1728 B.C.), lei di Tiglath-Pileser I, rei di Asiria (siglo 12 B.C.), komo promesa di Hippocrates (460-377 B.C.) a prohibí aborto. Aborto tabata praktiká durante era di e griegonan i romanonan [337 B.C. – 3 A.D.). Ma nan a usa métodonan rudimentario.

Awendia, armá ku teknologia moderno, e industria lukrativo di aborto por ta mas efisiente i mas efektivo. Segun Organisashon Mundial di Salubridat, mas ku 150.000 beibel ta abortá kada dia. ...esta 54.750.000 ser humano inosente i indefenso ta kruelmente ehikutá kada aña (mas hende ku henter poblashon di Fransia).

Maske **aborto na Antia ta ilegal**, nos outoridatnan ta sera wowo mientras médikonan sin eskrupelo (hende ku a primintí pa salba bida) ta kita bida na forman kruel. Nos no tin sífranan ku ki frekuensia ta abortá na St. Elisabeth Hospitaal na Kòrsou. Ma nos a yega di papia ku hende ku a mira ku nan mes wowo loke ta pasando i tabata di shòk pa e kantidat grandi di aborto ku ta tuma lugá na SEHOS. Nan konklushon tabata ku hopi hende ta abortá na lugá di usa antikonseptivo.

Teknologia moderno ta fasilítá aborto! Un prosedura komún ta pa usa un “zuiger” pa ranka pidanan chikitu di e plamenta i kurpa di e beibi kita te ora a chupa henter e beibi for di matris. Para pensa un ratu kiko esei ke men. E “zuiger” ta kibra wesu i kraneo di e pobersito beibi, ranka un brasa òf pia for di su kurpa, te ora ta logra saka kada pida di e beibi kuartisá den su totalidat, for di barika di su mama. No tin duda ku esaki ta un morto sumamente kruel i doloroso!

Danki na teknologia moderno, na aña 1992 a reportá ku Dr. James T. McMahn a inventá un método nobo pa abortá beibinan den e di tres trimester...esta, **beibinan ku por sobreviví si nan nase e tempu ei**. E aborshonista ta kohe pianan di e beibi i ta ranka henter kurpa di e kriatura dor di boka matris i vágina. Pues, henter e kurpa ta nase, ku eksepshon di e kabes (ku ta mas grandi). Anto ku un skèr e aborshonista ta bora un buraku na base di kraneo di e beibi, i ta hinka un “zuiger” den e herida. Dor di e herida e “zuiger” ta chupa e sesunan di e beibi saka. Esaki ta pone e kraneo kibra kai aden, pèrmitiendo e aborshonista pa kaba saka e beibi for di matris.

Ma teknologia moderno no por kura e **kulpabilidad** ku e mama i tata di e beibi ta sinti despues di abortá. Teknologia moderno no por saka for di nan kabes ku nan a laga asesiná nan propio yu. Teknologia moderno no por kita e **depreshon, ansha, i tristesa** ku ta sigui òf un **tendensia mas grandi pa kometé suicidio**. Teknologia moderno no ta prevení nan **oumento den uso di alkohòl i droga** pa hoga nan problemanan.

Teknologia moderno no por hasi esei. Ma Hesu-Kristo si por! I ta E SO ku por! Maske E ta e mésun Dios ku a bisa kategórikamente “*No mata*” (Eksodo 20:13), E tambe ta laga sa, “...*esun ku bin serka Mi, sigur-sigur lo Mi no tir’afó*” (Juan 6:37). E ta Esun ku ta invitá “*Bin serka Mi tur ku ta kansá i kargá, i lo Mi duna boso sosiegu*” (Mateo 11:28).